



Jens-Frederik Nielsen, Demokraatit
/Maani

Akileraarusiissutit appartinneqarnerisa sunniutaat pillugit § 37 naapertorlugu apeqqummut 2024-128-mut akissut

Brevdato: 24-06-2024
Sagsnr. 2024 - 12747

Matumuuna § 37 naapertorlugu apeqqummut siuliani taaneqartumut akissutit nassiunneqarput.

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanaoq.gl
www.naalakkersuisut.gl

1. Nunatta Karsiata procentpointimut ataatsimut isertitat qassit aannaassavai isertitanut akileraarut appartinneqarpat?

Nuna tamakkerlugu akileraarutip procentpointimik ataatsimik allanngornerata toqqaannartumik sunniutai 2024-mut Aningaasanut Inatsimmi takuneqarsinnaapput, paasissutissallu taakku konto pingaarnerup 24.10.10 Nuna tamakkerlugu akileraarut, aningaasaliinermi tunngavissat ilaattut allassimapput. Akileraartarnermut malittarisassat allanngortinneqannginnissaat tunngavissaatillugu akileraarusiissutit allanngortinnera 2024-mi inummut akileraarummi 124,6 mio. kr.-t missaannik, 2027-mi 132,0 mio. kr.-nik annertusiartortumik iluanaarutit allannguinermit kinguneqassasoq ilimagineqarpoq.

Matumani toqqaannartumik iluanaarutitigut allannguinerit ilanngunneqarnerat maluginiaqquneqarpoq, taamaalillunilu assersuutigalugu sulisinnaasut amerlassusiini, aningaasarsiatigut isertitani il.il. malitseqaataasumik sunniutaasinnaasut taamaalillutik ilaatinneqanngillat.

2. Pisortanut aningaasaqarnikkut allaffissornikkullu suut kingunerissavai, ingerlatsivinnut akileraarut 20 procentimut appartinneqaraluarpat?

Ingerlatsivinnut akileraarutip allanngortinnerata sunniutai 2024-mut Aningaasanut inatsimmi isertitatut missingiutini takuneqarsinnaasunut sunniuteqarsinnaapput. Ingerlatseqatigiiffinnut akileraarutit tamarmiusunut isertitassat missingiutit 51 mio. kr.-upput. Taakku nalinginnaasumik ingerlatseqatigiiffinnut akileraarutit 41 mio. kr.-nit, tak. konto pingaarneq 24.10.14 Ingerlatseqatigiiffiit akileraarutaat iluanaarutiniillu akileraarutit, kiisalu 10 mio. kr.-t ingerlatseqatigiiffinit kommunit agguarneqarnerisa avataaniittunit, tak. 24.10.11 Nuna tamakkerlugu immikkut akileraarut.

Uani Namminersorlutik Oqartussat aktiaatileqarluni ingerlatseqatigiiffiit akileraarutit isiginiarneqannginnerat maluginiaqquneqarpoq, tak. konto pingaarneq 24.10.12 Ingerlatseqatigiiffiit akileraarutaat, Namminersornerullutik Oqartussat suliffeqarfutaat.


Missingiutit taakku maanna ingerlatseqatigiiffinnut akileraarusiisummik 25 procentiusumit aallaaveqarput. Ingerlatseqatigiiffiit akileraarutaannik 5 procentpointimik annikilliliineq, taamaalilluni 10,2 mio. kr.-nik iluanaarutit annaasaqarnermik malitseqassaaq.

Konto pingaarnermi 24.10.14-imi ingerlatseqatigiiffinnit akileraarut kommuninut Nunattalu Karsianut agguanneqartarpoq. Taamaalluni ingerlatseqatigiiffinnut akileraarummik appaaneq, kommunit akileraarutitigut isertitaasa appariarnerannik malitseqassaaq. Ingerlatseqatigiiffinnut akileraarutip kingullermik appartinneqarnerani, Namminersorlutik Oqartussanit ataatsimoortumik tapiissutit annertusinerisigut kommunit annaasaannik taarsiivigineqanngillat.

Taamaammallu kommunit isertitatut toqqammavimminnik taamatut annikilliliivigineqarnerminni, ileqqaarnermi pisariillisaanermi imaluunniit kommunimut akileraarutip qaffanneratigut, annaasaminnik taarsiiniartariaqassapput.

Siuliani taaneqartuni taamaallaat toqqaannartumik iluanaarutitigut sunniutit pineqarnerat erseqqissaatigineqassaaq. Apeqqummi taaneqartutut ingerlatseqatigiiffinnut akileraarummik allannguineq, tunngaviusumik suliffeqarfiit aningaasaliinernik sumiiffinnilu aalajangiinernik, sinneqartoorutinik nuussinernik, sulisinnaasunik, iluanaarutinik il.il., aningaasatigut malitsigisaanik kinguneqarsinnaavoq.

Inussiarnersumik inuulluaqqusillunga



Erik Jensen